

Date – 05/03/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoma’n Sawhthing dahna hmun kudam hrang hrang leh Collection Centre a khah tawh avangin sawhthing lei an chawlh rih a ngai dawn a ti.
- 2. Agriculture Minister Pu PC Vanlalruata’n tun dinhmunah sawhthing chu Grade-a then tumna a awm rihlo a, chhungkaw khat atangin lei tur zat bithliah a awmlo bawk a ti.
- 3. Prime Minister Narendra Modia chuan sawrkarin mipui, eibar dinhmun economy leh ngaihtuahna thar atan te sum hman a ngaihpawimawh thu a sawi.
- 4. Amritsar Rural Police te chuan Punjab-a Jandiala khuaah heroin kg 23 an man.



CM

Chief Minister Pu Lalduhoma’n Sawhthing dahna hmun kudam hrang hrang leh Collection Centre a khah tawh avangin sawhthing lei an chawlh rih a ngai dawn a ti a, an hralh thawl hunah Sawhthing lei chu an chhunzawm leh dawn a ti.

Vawiina Assembly thutkhawma zawhna leh chhanna hunah he thu hi sawiin Chief Minister chuan sawhthing an lak khawm an dahna hmun chu a khah tawh avangin inhralh thawl phawt a ngai a ti a, a tahtawlin an tih dawn avangin kuthnathawktute hmanhmawh lo tura chahin an inhralh thawl hunah leh dahna tur a ruah velah sawhthing an lei chhunzawm dawn tih a sawi.

Pu Lalduhoma chuan sawhthing chu kumin chhunga tharchhuah chu an lei ngei dawn tih sawiin kuthnathawktute thlaphang lo turin a chah a, an lei sa chu hralhna tur an ngaihtuah tih a sawi.

Chief Minister sawi danin, sawhthing chu Reliance Company in kg khatah cheng 80 in an la a, Kolkata-a Reliance Outlet-a zawrh turin sawhthing chauh lo thlai thar dang pawh an lei a, kumtluanin an duh reng bawk a, tunah hian Mizoram ah Collection Centre din an duh tawh a ni a ti.



AGRICULTURE MINISTER

Agriculture Minister Pu PC Vanlalruata'n tun dinhmunah sawhthing chu Grade-a then tumna a awm rihlo a ti a, chhungkaw khat atangin lei tur zat bithliah a awmlo bawk a ti.

He thu hi vawiina zawhna leh chhanna hunah Congress MLA Pu C. Ngunlianchunga zawhna chhangin Minister chuan a sawi a, sawhthing leikhawmna atan Sawrkarin Secondary Collection 62 a siam a, Secondary Collection Centre ah auction a ni dawn tih sawiin kg khatah cheng 50 a tlin lohna chu support price hmangin kuthnathawktute hnenah pek a ni dawn tih a sawi.

Agriculture Minister chuan sawhthing leina atana an inbuatsaihna pakhat chu Secondary Collection Centre-a auction a ni a ti a, kg khata cheng 50 in a chhangtu an awmloh chuan sawrkarin a laksak dawn a ti a, hei hi Secondary Collection mumal zawka kalpui anih theih nana bultan chhungte, a man sang zawka nawr anih theih beiseina leh an tharchhuah tam thut avanga buaina awm venna atana hmalakna ani tih a sawi.

Minister chuan Sawrkarin sawhthing man a tum chin tur chu kuthnathawktute hnenah Direct Beneficiary Transfer hmanga pek tura ruahman a ni a ti a, Secondary Collection Centre chu Society hnuaia sumdawnna puitling kalpui thei tura thuam chak a, support price hmanga sawhthing man hniam lutuk tur ven chu sawrkar tum dan a ni a ti a, Market ngelnghet zawk siam theihna tur ani beisei a ni a ti bawk.



MZP-ZORAM NI

Mizoram Rajya Sabha MP Pu K. Vanlalvena'n kum 1966-a Mizoten zalenna an sual kha India chanchina nasa ber leh rapthlak ber a ni a, India sorkarin ralpui beiha a beihlet awmchhun a nih thu a sawi.

Vawiina Mizo Zirlai Pawl (MZP) General Headquarters, Aizawl-in kum 1966 March ni 5-a Mizoram Bomb hmanga beih champhaphak, 'Zoram Ni' Dawrpui Multipurpose-a a buatsaihah Rajya Sabhya MP Pu K. Vanlalvena chuan Mizoten kum 1966 a India sorkar laka zalenna a puan, Jet Fighter meuh hmanga hmeh hmih tum a ni khan kha movement nep loh zia kha a ti lang a, Mizote chu hnam namen lo tak an ni tih a sawi a, Mizo Independence Movement chu hlawhtling chiah lo mahse, India Danpui-ah Mizote himna tur Chiang takin tarlan a nih phah tih a sawi a, ram leh sakhua humhim chu Mizo mipuite mawhphurhna a nih thu a sawi a ni.

MP chuan tun hnaiah Manipur, Burma leh Bangladesh atanga Zohnahthlak unau raltlante ngaih theih lohna leh hmuhsitna sawi a tam hle a, engtik niah emaw chuan tuna Mizorama him taka cheng te chuan state leh ram thenawma Zohnahthlakte chu an belh hun a la thleng lo ang tih a sawi theih loh avangin, chapo thei an ni lo tih a sawi bawk a ni.

Kumin Zoram Ni thupui "Tho la ding ta che" tih hmangin Lengzem Editor, Pu Vanneihtluanga chuan thu a sawi a, MZP President Pu H. Lalthianghlina pawhin thusawiin, Zoram Ni puala Article inzhiah siak leh Reels insiamsiak a lawmman sem a ni bawk a ni.



MIZORAM LIQUOR PROHIBITION AMENDMENT BILL

Zu zawrhna dan siamthatna tur, “The Mizoram Liquor (Prohibition) Amendment Bill, 2025” chu vawiin sessiona pharh tur chu eptu MLA ten nizana an hmuh chauh avangin, an zirchian hnu ni 2 emaw ni 3 hnuah emaw sawiho tura sawn a ni.

Vawiin Assembly rorel inkhawma ngaihtuah tur, “The Mizoram Liquor (Prohibition) Amendment Bill, 2025” chu a puluttu tur Excise & Narcotics Minister Pu Lalnghinglova Hmar sawm a nih hma-in Speaker Pu Lalbiakzama’n eptu party hruaitu pathum – Pu Lalthhandama Ralte, Dr. K Beichhua leh Pu C Ngunlianchunga te’n tukinah a pisa-ah an hmuh thu leh, Bill copy chu nizana an hmuh chauh thu te, inzirna hun an la neih loh bawk avangin ni 2 emaw ni 3 hnuah emaw sawiho mai ni se ti-a an ngen thu a sawi a. House Leader leh Parliamentary Affairs Minister te a rawn hnuah eptute ngenna chu zahawm an ti a, Bill chu hun danga putluh atan an ti ta niin a sawi.



PRESS MEET ON E-KYC

Mizoram Sorkar chuan National Food Security Act hnuai-ah ration buhfai a thlawna an dawn chhunzawm zel theih nan, Ration Card eng leh pawl nei zawng zawng te tih chianna, E-KYC chu tun thla March ni 31 ral hmaa ti vek turin mipuite a chah.

Mizoram Food, Civil Supplies & Consumer Affairs Department Secretary Pi Teresy Vanlalhruaii chuan vawiin khan a pisa-ah thuthar thehdarhtute he thu hi hrilhin, Supreme Court thupek bawhzuiin Mizoram sorkar chuan ram pum rualin National Food Security Act hnuai-a Ration Card eng leh pawl nei zawng zawng te tih chianna, E-KYC a kalpui mek tih a sawi a, eKYC kalpui dan tur hi chiang taka ziahlan a nih loh avangin Mizoramah chuan Ration Card Management System, (RCMS)-ah beneficiary te nihna tih chian hna an kal pui phawt a, zawh fel vek a nih hnuah epos (khawl) hmanging NFSA Ration Card-a hming chuang zawng zawng te kutzungpui nem chu an kal pui leh mek a, NFSA hnuai-a Ration Card eng leh pawl hmang chhungkaw member tinin EKYC hi an tih a ngai a, Card var nei te tan tih ve a ngai lo thung tih a sawi a ni.

EKYC hi NFSA beneficiary ration card-a hming chuang te a takin an la awm ngei em tih te, NFSA buhfai a thlawna dawng tura allocation la siam kep tur an la awm reng em tih chian nan leh, lamhla-a hnathawk te’n khawi hmunah pawh NFSA ration an lak theih na tura kalpui a ni a, Mizoramah chuan thla hmasa February ni 20 atang khan tih tan niin, vawiin thlengin mi nuai 1, sing 9, sang 7, 435-in an ti tawh a, NFSA hnuai-a Ration card holder mi nuai 6, sing 9, sang 6, 692 atanga chhuta zaa 28.34 chauh a la a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM MODI

Prime Minister Narendra Modia chuan sawrkarin hmasawnna ruhrel leh industry te tana sum peipun a ngai pawimawh ang bawkin mipui, eibar dinhmun economy leh ngaihtuahna tharte a ngaihpawimawh thu a sawi. Vawiina Post-Budget Webinar on Employment ah he thu hi sawiin PM Modia chuan mipuite hmasawnna tura sum peipung turin innghahna lungphum pathum zirna, thiamthil leh healthcare chu an ngai pawimawh hle tih a sawi.

(Byte)

Pu Modia chuan India rama zirna kalphung chu tun kum 10 kalta chhungin nasa takin a inthlak danglam tih a sawi a. Tun budget ah khan tualchhung leh rampawn lam mite hip turin tourism lamah sum dah tam anih thu a sawi bawk a ni.

<><><>

HEROIN

Amritsar Rural Police te chuan Punjab-a Amritsar chhunga Jandiala khuaah heroin kg 23 an man. Ruihhlo mante hi India mi ruihhlo tawlhru thin USA-a inkulh mekte nen inzawmna neia hriat a ni a.Border Range DIG Satinder Singh chuan an thudawn rintlak tak bawhzuiin heroin hi an man thu a sawi a. Ruihhlo neitua puh hi zawn mek niin US-a inkulh ruihhlo tawlh thinte nen an inbe pawp tih sawiin ruihhlo te hi rampawn atanga lo thawn luh niin DIG chuan a sawi a ni.

<><><>

ROPEWAY

Union Cabinet chuan Soprayag atanga Kedarnath kalpawhna tur ropeway siam a remti. He ropeway hi Km 12.9 a thui tur niin cheng vaibelchhe sang li chuang sen a ni dawn a. Union I&B Minister Ashwini Vaishnaw chuan he ropeway hian sakhaw biakzina kalte tan veivah chhung chu darkar 8-9 atangin minute 36 ah a ti hniam dawn a ti a. Rualbanlote leh kum upaten an chhawr hle dawn tih a sawi bawk a ni.

<><><>